



FASNACHTSCLIQUE
JUNTERESSLI
FASNACHT 2018

All you can tweet!

Die ganzi Wält ei Gartehag,
E Hashtag-Gwitter jede Tag,
Viel virtuelle Rauch und Schall,
Viel Smileys, Icons überall.
D Fasnacht numme schint als Zit
Real, was nit so Twitter git.

heissi Luft und Näbelschwaade
Für die drei schönschte Hash-Dääg hämmer glaade!

Salli zämme! Katze-Dorli
Heiss ich, und mi Büsi Schnorri.
Wenns Schnorri so durs Katze-Dörli
Gumpt, gits Fotteli nodürlich.
Die dueni miner Fründin maile
und denn im Netz für alli deile.

Katze: Katze jede Tag
Am liebschte ungschpitzt uffem Gartehag.

I bine rächte Eidgenoss,
Dr Blocher Christoph isch mi Boss,
Uss lutter Wuet reg ich mi uff,
Setz uffem Facebook no eins druff,
Bi Toleranz gseh ich scho rot,
Und Duume abe wos nur goht

Wuet: bisch scho am zittere
Muesch unbedingt das au no twittere?

I bi sit gescht uff Instagram,
Mi Body het kei fettigs Gramm,
Und numme Musggle. Mi Profil
Heisst Beauty, und mi Ziel: soviel
Wie möglich Fottishooting mache,
Und uff de Fotti lache, lache....

Schönheit: isch so flüchtig
Sinn dorum alli Fotti-süchtig?

Als Troll do find ich Russland toll!
D Medie sinn jo alli voll
Mit falsche news und falsche Zahle.
Das isch mi Gschäft: mir fälsche Wahle
Au in dr schöne nöie Wält
Regiere schliesslig Macht und Gäld.

Russland-Posts: bis d Finger wund,
Ich frog mi isch das wirgigg gesund?

Im Garteblog zum Griene Duume
Do schrib ich über Öpfel, Pfluume,
Blattlüs, Schnägge und Salat,
Für slow food, gege Glyphosat,
Zue Wätterregle, Söi und Kieh
I ha – und gib mer – wahnsinns Mieh.

Blog: s git viel wo wenig nütze,
Wie die wort dört wos rägnet Wasser sprütze.

Hallo ich bi d Apple-Siri,
Ich bi bekannt als grossi Liri
Was wotsch? Was kani für di mache?
Wotsch chatte, schpile, oder lache?
Muesch numme d Frog präziser stelle,
Denn sag i dir was du hesch welle.

Siri: si hett ihri
Schnuure programmiert in Ziri.

Als Chatbot läb ich – eventuell
Au redundant und virtuell.
Uff Bstellig mach ich Poesie,
Prognose, Bricht voll Empathie,
Und fröi mi wenn ich ganz wit hinde
Im Internet e Mensch due finde.

Chatbots: sinn begeischeret
Am chatte was kei Mensch me meischteret.

Und doch: dä Rauch, dä Qualm und Dunscht
Isch ur-uralt nit umesunscht,
Denn Geschichte sinn us Rauch gebore.
Me sitzt ums Füür mit heisse Ohre.
E Gsellschaft duet so überlääbe,
Mit Gschichte wo si zämmeklääbe.
S blibt troztdäm öbbis, nundefahne,
Und d Folge kame höggschtens ahne:
Wenn d Algorithme drüber richte,
Wär über welli Gschicht darf brichte,
Wenn Algorithmen dirigiere:
Wär kontrolliert was die studiere?
D Kontrolle do die ghört in d Händ
Vo uns allne schlussemänt!

Pessimismus kasch dr schängge
Es hilft dr nüt, muesch witter sälber dänggel!

Mechtsch aaf Pfyffe oder Drummle, bisch mindischdens 7 Jahr alt
und hesch Luscht zem sälber Fasnacht mache? So mäld dy lieber
hit als morn bi unserer Obfrau vo dr Junge Garde, dr Salome Hofer,
salome.hofer@bluewin.ch oder kumm diräggt ans Yschribe vom 10.
Meerz 2018, 11:00 bis 14:00 zu uns in Käller an dr Drohtzugstrooss 69.

D Ladäärne-Uusstellig uff em Münschterplatz und d Waage- und
Reggwisye-Uusstellig bi dr Kasärne sin vom Määntig znacht bis am
Mittwuch demoorge! Dört und an de 3 Verkaufsständ (CINS) in dr
Stadt ka men au alli Zeedel und Schnitzelbängg, d Blaggedde und
dr Rädabäng kaufe.

Am Fritig und Samschtig, 23. und 24. Februar 2018 isch
Noochwuggswärbig vo dr 1. Lektion im Zält uff em Barfi.

D'Zeedellääsete isch am Sunntig noo dr Fasnacht 2018 am 25.
Februar vom Fimfi bis am Siibeni zoobe in dr Baseldytschi Bihni
(im Lohnhof 4). Dr Ytritt isch vergäabe. D Foyer-Bar isch vom Vieri
ewägg offe.